

四庫全書薈要

• 乾隆御覽本

集部

欽定四庫全書薈要

集部  
文憲集卷十一

詳校官候補通判經歷郭祚熾



文憲集卷十一

明 宋濂 撰

傳

凡三十二章

余左丞傳

卷十一

余闕字廷心一字天心唐古氏世居武威父錫喇卜藏布

官合肥遂為合肥人母尹氏夢異人生闕闕生而髮盡白家貧年十三始能就學嗜欲甚淺不知有肉味唯甘六藝學若飴嗜之不厭與河南張恒游恒臨川吳澄弟

子善談名理闕學之因絕出四方擢元統癸酉進士第授同知泗州事泗瀕淮民豪弗馴令蝕人土田官籍之多以誣去闕繩尤暴者數十不敢譁廖甲與舒乙競田廖焚舒廬舍舒婦偶母子同死遂置灰燼中誣之闕為白其事泗無麥民以乏故事弗聞闕上之中書定為令凡無麥者減賦代還長老爭進金為壽闕謝去後闕往桐城道逢故民皆羅拜馬首相隨信宿而別俄召入應奉翰林文字轉中書刑部主事三月之間䟽滌冤滯獄



五百上官忌其才議寔不合闕上宰相書言狀又不報  
投袂而歸居亡何復召修遼宋金三史拜監察御史上  
疏言守令最近民欲萬國治責守令反是政龐宜用殿  
最法力行之便上從之藩王府諸校白晝斂金道上勢  
如狼闕鞭遣六十人上思治切議遣奉使巡察郡國闕  
言奉使恒無狀所至處食飲供張如事至尊曾不能宣  
上憂恤元元之意宜亟罷之闕後補外會奉使者亦至  
執闕臂曰誠如君言知闕忠亮不怨闕在位知無不言

言隋直無忌人勸闕少辟旣闕曰吾縱昏豈不知批逆  
鱗為危委身事君身雖殺弗悔也改中書禮部員外郎  
闕議復古禮樂其言精鑿有徵聞者斥為迂闊弗用安  
西郭氏女受聘未行會夫卒郭自縊死有司請旌其門  
闕以過於中庸不可以訓格不下出為湖廣行省左右  
司郎中廣西多岐山負粟輸官者厄於道險費常倍闕  
命以為帛代輸右丞沙班怙權自用多錄其私人闕每  
抗辭沮之會莫徭蠻反當帥師又止不行無敢讓之者

闕揚言于庭曰右丞當往受天子命為方嶽重臣不思  
執弓劍討虜乃欲自逸耶右丞當往沙班曰郎中語固  
是如芻餉不足何闕曰右丞第往此不難致也闕下令  
趣之三日皆集右丞行章宣慰已延以婆律香贄闕  
覺重辟之香中果胎黃金章嘆曰余贄達官多矣潔如  
冰壺唯余公一人復以集賢經歷召入預修本朝后妃  
功臣傳遷翰林待制出僉浙東道廉訪司事發姦擿伏  
聰察若神州縣聞闕至貪墨吏多解印綬去發定賊無

藝役小大各違度闕遊官履畝實之徭賦平衢士無養  
以沒入田分隸學官郡長燕只吉台肆毒殘衢民民重  
足立闕鞠治之獄上行御史臺臺臣與其有連反以事  
劾闕闕歸青陽山已而丁尹氏憂闕日夜悲號有甘露  
降于墓君子以為孝感至正壬辰天下兵動平章政事  
鴻和爾布哈方統戎淮南承制起闕權淮西宣慰副使  
分治安慶安慶距城皆盜柵人爭謂不可往闕毅然請  
行從間道入推赤心待人罷其苛賦轉粟以哺餓夫同

社民翕然歸闕知民可用乃帥之破雙港砦砦甚固小

路若髮闕被甲荷戟直前賊空砦出鬪殺傷相當至日

是賊殊死戰鬪不勝退復收散卒誓曰死則死此爾何

生為一鼓而進大破之諸砦畏威次第降闕益繕城浚

濠礪矛戈分屯耕郊外田民懼不能者遣軍士護之耕

賊來輒與戰一日賊四合旌旗蔽野鼓譟之聲震天地

闕縱梟騎數十大喊而出賊勢披靡遣兵擊之斬首數

千級當是時淮東西皆陷獨安慶巋然存賊來戰又數

敗賊銜之偽作尺牘通城中諸大姓約期日反冀闕捕戮之闕曰我民安有是命悉焚去賊計窮復令闕故人衛鼎許大明以甘言說降闕命牽出以鐵椎擊碎齒頰懸其皮東門瀟山有虎傷人闕造文檄山神使驅虎虎出境功上中書朝廷俾為真陞同知淮西宣慰副都元帥賜以上等及黃金束帶江西諸官軍動號數萬掠玉帛殺嬰兒置戟上以戲沿江州郡患苦之獨不敢近城下即近出師搗退之或服其義至有來歸充將校者溪

河兵屯潯陽命使者帥壯士百輩腰刀直入脅主供億  
闕叱左右收縛付獄且上疏言苗獠素不被王化其人  
與禽獸等不宜使入中國他日為禍將不細後竟如闕  
言轉淮南行省叅知政事尋改右丞賜二品服闕益自  
奮誓以死報國立旌忠祠以厲將佐時集祠下大聲謂  
曰男兒生則為常孝寬死則為張巡許遠不可為不義  
屈意氣慷慨甚丁酉冬賊大集諸部圍城戰艦蔽江而  
下樵餉路絕兵出數失利戊戌正月七日城陷闕猶帥

衆血戰身中三矢賊呼曰余將軍何在吾將官之有生  
致者予百金闕戟手罵曰余恨不得嚼碎汝肉吐餒烏  
鳶寧復受汝官邪賊怒舉長鎗欲刺闕闕遂自剄沉水  
死年五十六其妻耶卜氏聞之亦率其子得臣女福章  
赴水死諸將卒慟曰余將軍不負國我等可負余將軍  
邪從而死者千餘人朝廷知其忠贈闕榮祿大夫江浙  
行省平章政事諡曰忠愍追封夏國公闕為人剛簡有  
智無職不宜為為即有赫赫名所至薦賢旌孝義如恐



後每解政開門授徒蕭然如寒士五經悉為之傳註多  
新意詩文篆隸皆精緻可傳

贊曰於戲關真人豪也哉獨守孤城逾六年小大二  
百餘戰戰必勝其所用者不過民間兵數千初非有  
熊虎十萬之師直激之以忠義故甘心效死而不可  
奪也雖不幸糧絕城陷以死而其忠精之氣炯炯上  
貫霄漢以繁為列星流為風霆散為卿雲凝為瑞露  
闕雖死而其不死者固自若也然而關死於君而能

使妻死於夫子死於父忠孝貞節萃於一門較之晉  
卞壺家又似過之矣於戲闕果人豪也哉余來江左  
見其門生故吏言闕事多至泣下因想見戰守處江  
流有聲而斷雲落日淒迷於莽蒼間猶足以動人悲  
思因掇其行事成傳以示為人臣者

濂既作余廷心傳又見其門人汪河言當廷心死時  
其妾滿堂生一子甫晬棄水濱有偽萬戶杜某呼曰  
此必余叅政子是種也良不可殺竟捐所鈔諸物懷

子以去今三歲矣人或戲子曰汝父何在子橫指拂  
喉曰如此矣此一事也池州判官李宗可斬人也李  
嘗文身又號為花李善槊視賊欲吞廷心兄闌嘗以  
女歸之及來舒命權義兵萬戶統新軍守水砦前後  
多戰功賊來破城李橫槊入賊中殺死甚衆聞廷心  
死馳馬還家聚妻孥謂曰余相公死國吾亦義不屈  
汝等毋不死為人所魚肉拔劍無大小盡殺之出解  
甲據胡床中坐取酒飲至醉復衣甲自刎死此一事

也嗚呼仁者宜有後而義烈之士聲光可流於無窮  
濂雖不文唯恐其失墜也故復附著於篇

白牛生傳

白牛生者金華潛溪人宋姓濂名嘗騎白牛往來溪上  
故人以白牛生目之生軀幹短小細目而疎髯性多勤  
他無所嗜惟攻學不怠存諸心著諸書六經與人言亦  
六經或厭其繁生曰吾舍此不學也六經其曜靈乎一  
日無之則冥冥夜行矣生學在治心道在五倫自以為

至易至簡或笑其迂生曰我其迂哉我若迂孟子則迂之首矣生好著文或以文人稱之則又艷然怒曰吾文人乎哉天地之理欲窮之而未盡也聖賢之道欲凝之而未成也吾文人乎哉或求學文生曰其孝弟乎文則吾不知也生不肯干祿或欲挽之使出生曰祿可干耶仕當為道謀干之私也生安於義命未嘗妄有所為或疑其拙生曰我契以天不合以人是乃巧之大者拙乎哉生慕孔顏之樂如聆鈞天之樂如獲褭蹠之金言及

之手舞足蹈不已或以為狂生曰吾能知之恨未能允  
蹈之奚其狂生幼多疾常行服氣法或謂其欲久生生  
曰盜跖甚夭顏子其壽子知之乎或人不答生曰竊陰  
陽之和以私一已服氣矣運量元化節宣四時服氣乎  
生雖貧喜色常溢眉宇間或詰之生曰吾內足樂也內  
既足樂無人非無鬼責得亦樂失亦樂我何憂哉生御  
惡衣脩饌安之或慮其詐生曰錦衣與卉服雖異暖則  
一糟覈與淳醪固殊飽則均何詐為生不貴貴人不貧

貧人或尤其無別生曰貴自貴爾於我何加焉賤自賤  
爾於我何損焉生遇物以誠三尺之童莫之敢欺或譏  
其同生曰我道蓋如是同不同弗知也生不享外神唯  
事其先甚謹或謂其報本耶生曰非唯報本也以氣感  
氣吾先以之外人何預哉生多讀台衡賢守慈恩諸家  
書或謗其偏生曰我雖口之未嘗心之也何其偏生當  
情意調適輒懸特磬於簾親擊以鐵篳篥目側耳而聽  
自以為達制樂之原或笑之生曰此蕘桴土鼓之遺聲

也五音繁會則末矣生好着屐登山遇境勝處注目視  
弗釋或惡其癖生曰吾於巒容川色見三代之精華不  
忍舍也生年四十有六髮無白者日坐一室中澄思終  
日或執筆立言動以賢聖自期其中之所存者人固莫  
能識也適有畫史貌生之騎白牛者生大笑以為得其  
真故自疏其事如左曰白牛生傳云

贊曰生妄人也哉言其文弗能成章言其道則又邈  
乎未之見也猶自語諸心曰我學古人我學古人不



亦悖且戾乎

鄭氏孝友傳

鄭生宗文父白麟二十一世孫也其先居滎陽疑道遷歛自牖遷睦淮遷浦陽今為浦陽感德鄉人淮綺之祖也綺通春秋穀梁學撰合經論數萬言事父母孝父照以非罪繫獄當入死綺上疏郡守錢端禮請以身代端禮察之白其誣母張病風攣綺保持若嬰兒袒適廁必抱就之三十年不懈綺生聞聞生運運生政政生德珪

德璋至元中仇家傾德璋以死罪將械送揚州德珪毅然代其行德璋泣隨之爭欲赴吏德珪竟以詭計先死之德珪生文嗣自綺至文嗣凡同居六世歷二百年咸如綺在時至大二年秋九月鄉老黃汝霖等言於縣上其事廉訪使加審按馬文達中書禮部四年春二月準式旌表門閭文嗣生鑑鑑生渭渭生挺皆善守合數千指無異心者重紀至元元年冬十二月太常博士柳貫與鄉校羣士又上狀請如故事復其家從之初文嗣

既沒德璋子大和司家事嚴而有恩雖家庭中凜如公  
府子弟稍有過頌白者猶鞭之每遇歲時大和坐堂上  
羣從子皆盛衣冠鴈行立左序下以次進拜跪奉觴上  
壽畢皆肅容拱手自右趨出足武相銜無敢叅差者見  
者喑喑嗟慕謂有三代遺風雖石奮之家亦所不及名  
聞天下自大丞相及臺院諸公卿多賦詩美其行部使  
者武威余闕行縣以其孝友七郡或莫之先書東浙第  
一家以褒嘉之皇太子在青坊聞其事而嘆曰此國家

之祥瑞也復親御翰墨畀以鳳麟二大字翰林學士承  
旨歐陽玄為之贊勒石以傳大和性正方不奉浮屠老  
子經像冠昏喪祭必稽朱熹家禮而行子孫從化孜孜  
孝謹不識廛市嬉戲事執親喪哀戚甚三年不御酒肉  
食食貨田賦之屬各有所司無敢私凡出納雖絲毛事  
咸有文可覆挾日則會不公則監視發之諸子晝趨功  
入夜輒坐棣華軒中溫溫語笑至更餘始休雖多列顯  
仕或入侍經筵出持使節不敢挾此有一毫自驕意諸

婦唯事女紅不使豫家政宗族里閭以恩懷之各有差  
內外極嚴輿臺通傳不敢越堂限家畜兩馬一出則一  
為之不食人以為行義所感有家範三卷傳于世

贊曰史氏之言多有不足取信者濂少時嘗讀唐書  
宰相世系表謂白麟之後不傳私竊信之及觀司空  
圖榮陽記則曰白麟生師慎師慎生懷芬懷芬生鄧  
鄧生斌卿斌卿生唐青州刺史庶庶生侍中徽徽生  
大理卿鄺鄺生鱗鱗生給事中暮暮生宣州觀察使

回又觀鄭燮生遂安譜則曰回生弘弘生垣垣生倅  
倅生子襲子襲生扈扈生宋歙縣令疑道疑道生殿  
中侍御史自牖自牖生祕閣校理安仁安仁生淮淮  
生照照生冲素處士綺綺即傳之所書者也其承傳  
次第灼灼可信如此惡覩其所謂不傳者哉考徵不  
廣而欲以一人之見聞定百載之是非難矣

此傳作於至正初已刻浦陽人物記孝友篇中近  
板毀於火因重鈔於此以勵民俗云

吳德基傳

吳德基者名履娶之蘭溪人也其父景奎故為儒鄉人  
師尊之酷好為詩游山澤間方苦吟而雨至雨濡其衣  
弗知也德基少受學聞人先生夢吉學春秋俊邁有奇  
材長通諸史為文辭願學司馬遷班固最好書尤工行  
草得之者藏弄為榮元季教授鄉里名動一時國朝取  
娶李曹公文忠為浙東省左丞聘德基為郡儒學正李  
公數與語知其才辟為掾稱疾而辭有司舉于朝為南

康丞南康俗悍其民以為丞儒者也易之德基自如數月皆周知其情偽有所發擿一縣驚伏德基乃更以寬化之視民如子民有訴召使前與語弗加咄叱民或援丞裾相爾汝弗責也有徵調召其大姓坐之廡下好言誘之聽人人自說便荅由是民愛丞如父而吏卒不能為姦民王瓊輝仇里豪羅玉成執其家人挾法笞辱之玉成兄子玉汝怒集少年千餘人圍王氏家劫奪家人歸且縛瓊輝連道箠之至家解衣箠殆死乃釋去瓊輝



兄弟五人庭訴齮指出血誓與羅氏俱死德基念成獄  
當連千餘人勢不便乃召瓊輝語之曰獨羅氏圍爾家  
邪對曰千餘人曰千餘人皆辱爾耶曰數人爾曰汝憾  
數人而累千餘人可乎且衆怒不可犯倘不顧死盡殺  
爾家而就逮雖有司有法汝悔何及耶瓊輝良久曰吾  
恨羅氏欲快吾憤爾惟明公所命德基乃捕操筆者四  
人於瓊輝前杖數十血流至踵命羅氏對瓊輝引罪拜  
之事遂止兩家皆叩頭曰公弭我事德甚宏咸願有所

上獻德基却去縣令周以中初至召民轉輸至郡不得  
躬至鄉召之一民逸去命卒笞之不肯伏走入山罵令  
曰官當在縣何以至此為令怒吏卒因以語動令欲誣  
一鄉民圖賄利獲六七人下獄扃鐐甚嚴卒方往捕未  
返鄉民大駭音駭德基計民無罪自出巡獄叱卒釋之卒  
以它辭解德基槌碎獄門遣之曰若無罪還告父兄無  
恐乃往告令令怒曰民無道衆辱我君乃釋之何輕我  
至是耶德基曰犯使君者一匹夫爾其鄉人何罪且法

乃天子法豈使君解怒具乎令意慙乃已其俗好淫祀  
有蛇出戶限民怪之以為神至奔走祠之德基罪神巫  
十人投其主江中為丞六年去知長沙之安化去三月  
他吏用法急南康民作亂命師討平之死者過半南康  
民泣曰我吳君在寧有此禍乎安化鄰古三苗其土豪  
多糾民為兵既盡降萬夫長易俊原獨恃驍勇與麾下  
數十人遁入山谷保險自固郡邑患苦之江陰侯吳良  
承詔求餘寇已移檄旁縣兵且集召德基計事德基曰

易氏未有反狀奈何激之使生變乎不若先以計致之  
果反用兵未晚也否則出兵無名民先受其害矣願君  
侯熟慮之侯曰令之言然吾為令徐之德基乃屏吏卒  
步至山谷中抵俊原家家空一老人出對客德基謂曰  
易俊原出見江陰侯則無事矣今不出大兵且至一縣  
民皆為齏粉然殺一縣父兄子弟者易俊原非縣令也  
老人曰俊原必出惟明府哀憐之德基謬曰俊原或未  
肯來得其子及麾下三四人先往可免矣明日其子及

麾下至如德基言兵止不發既而盡致其麾下惟俊原  
一人度兵勢孤乃招之曰君侯願與俊原相見俊原喜  
詣軍門請見遂縛送京師事平民安堵無擾江陰侯檄  
取故兵之為農者民咸自疑驚奔相告勢甚危德基屬  
耆老諭民曰侯所取者兵民無與也籍其願為兵者數  
人而止長沙郡令造戎衣德基力爭曰吾邑民貧而俗  
暴恩之且恐其叛去安可責以事功如他縣乎令格不  
奉命其罪小奉命而致亂其禍大決不敢辭小罪而蹈

大禍也郡從之凡有徵徭皆不使之與越三歲入朝擢知萊之濰州事民畜官驢四十匹萊守核其孳息狀與籍不合曰驢當歲產駒今幾歲宜得幾駒乃何少也欲責欺罔罪而徵其償諸縣皆已勒民買驢德基獨戒民勿償守怒問德基濰不償驢何辭也德基曰民實不欺妄烏可責其償國家富極海內為吏者宜宣布德澤為民除疾苦寧少數匹驢耶守語塞德基因畫不便者數事守不敢復言并諸縣已償者皆罷之山東民願以羊

牛代秋稅者官從其言德基與民計羊牛後有死瘠患  
不如納粟便獨收民粟他縣牛羊送陝西民驅走二千  
里皆破家郡以濫獨完令役千人部送鄰縣牛德基列  
其不可曰有牛家送牛雖勞不敢怨使人代之脫道中  
牛死誰當代償耶力爭不奉命德基為吏不求威名以  
愛民為先尤重獄事凡有訟召受訟者面直之釋其怒  
乃已不忍置民於獄獄屬空當有追需於民不務速辦  
稍緩其期約故物價不湧民視他所費恒減十二三所

至民樂其簡易而感之以為愛已居濰二年會改濰為  
縣召還濰民遮門抱其足泣拜曰自得吾父濰民膏無  
筭癥今舍我去願得隻履事之以慰我思其得民心如  
此德基至京師遂謝事歸將行辭其友翰林學士宋濂  
濂為德基交甚狎時亦致仕將歸呼德基謂曰若願受  
長者教乎德基曰唯何以命之濂曰天子官汝五品秩  
乞骸骨歸恩甚大汝知保之之道乎德基謝曰願卒教  
之濂曰慎毋出戶絕世更勿與交吾之教子無以加于



此矣德基至家如濂戒君子多其能受善言云

太史公曰世俗謂儒者少功顧非儒者爾湯之興以伊尹周之興以周公此獨非儒者耶何其功之大也彼世之儒者其號同其誦說同其所操守異於伊尹周公者多矣豈特少功哉謂之不足用可也然其間有足用者不可誣也俗吏以嚴急督責為足用謂儒者為懦緩債事而不知得民者非儒不能也余觀吳德基恂恂不大聲色而衆庶安其政既去而思之視世吏之督

責者果孰多耶德基之政固世俗之所笑者而其心誠愛民有足取焉古所稱平易近民豈弟君子非德基之謂耶所謂難與俗人言其此類耶

朱環傳

子元女壽附

朱環字君玉婺之義烏人漢槐里令雲四十代孫也赤子時無兒唬聲仲父桂奇之養為子桂後生璧及定周因外環環益孝謹凡勞事皆服行不知有寒暑時境內多盜白晝出道上劫人財桂有金數百兩與璧謀瘞害

中壁夜發去反誣環所為桂怒褫環襦袴立之大雪中  
一日夜不使去環恂恂謝過無一言辨其冤桂猶日虐  
環五六年間瀕死者數四恒順受之不忍桂死遇壁益  
厚壁子慶多暴或遂嫁以殺人罪環憂不能食竭私財  
救之慶獲免環善讀書寶祐間嘗舉進士年八十六終  
于家子元女壽

元字子初性警敏絕人至元末有盜數千起縉雲過永  
康置砦峽源山抵元家甚邇盜將劫元父環及環兄

遇魁為謀帥元聞遽歸告二翁速避寇不聽復涕泣諫  
翁罵曰豎子不解事江南內附久誰敢叛耶設有寇不  
過鼠竊狗偷何足病元自度賊若縛翁去則是翁從賊  
反官坐以法雖有百喙莫能白為今之計者孰若殺賊  
自明乃與役夫傅叅謀執刃伏垣下或止之曰賊勢張  
甚汝不畏作菹醢耶元曰吾知有親爾若得白親以無  
罪雖萬死不恨會賊偵騎至竟斫殺二人梟首市中以  
血手入示翁負之北逃賊平翁竟無罪

壽生有淑資年既長歸金華戚象祖台寇楊鎮龍反西  
攻婺州宗王昂吉岱及浙東宣慰使史弼捕獲之械至  
州城將鞠其反狀壽父環有亡奴在械中奴嘗怨環撾  
傷欲連環出貲助鎮龍時史怒寇甚凡獄辭所引必盡  
殺乃止環子元疾病不能起乃視壽泣壽曰昔緹縈能  
救父命我獨非人耶乃走告法曹掾馮耿賢曰妾父無  
罪亡奴欲誣以不道倘事不得直一家枉作泉下鬼聞  
君素長者獨不能相活乎言訖淚如雨馮怒曰此事豈

汝女子所知壽哀祈益切馮為惻然良久揮壽去曰爾但歸吾知所處矣明日使吏椎碎奴口不果誑

贊曰昔尹吉甫子伯奇無罪為後母譖而見逐履霜中野作履霜操其辭多怨傷濂竊謂伯奇不必爾也父母惡之勞而不怨何假於辭哉今環之無罪與伯奇同環羸身立大雪中則又非若履霜比也乃能順受之而無怨不賢而能之乎古之所謂純孝者環蓋近之矣元為親故拔劍斫賊而不知有身壽雖女子

亦能脫父命於虎口皆環身教之然也人之行莫大  
於孝孝有如環之父子可使無聞哉因具列之于篇  
白鹿生小傳

白鹿生者諸暨之人也風神峻爽翹然欲超羣其外族  
曰方建塾聘賢傳館四方游學士生往受諸經領其玄  
旨稍事文墨輒峻潔如淵珠衆譁曰生賦資絕倫非積  
功所可及盍遜其一席地聲光流婺越間煜煜能動人  
競要遮作州閭師數弗應浦陽江上有鄭氏一宗累三

十室同案而饒戒子姓執贄致辭生躍然興曰是或可  
為也即日上道舉比中居以倡道為己責與諸生言必  
稱曰昔之人曰昔之人日摩月切操行有可觀歷十春  
秋自以精明不逮前時退居白鹿山戴梭冠被羊皮裘  
帶經耕烟雨間暇則吟風弄月傲睨萬象若不知古今  
之殊軌有識者莫能窮其際高郵樂鳳來為州牧獨造  
門拜曰鳳聞先生賢言行無悖古先哲人願為州學子  
師生牢讓不起鳳不得已令間右子弟即其家問道州



政有闕失鳳必移書諮訪生白以利病裨助恒多後若  
千載殿中侍御史唐鐸出守越欲辟起之生力辭如前  
鐸不敢強生性醇篤無銖髮矯偽與人語出肺肝相示  
恥為覆藏事乖名義峻言斥之弗少恕家無儋石儲臨  
財甚介山氓誤坐法當死生憫其蠢愚謀諸鄉鄙活之  
氓輟烏犍為謝生拒之頓顙于地潜然隕涕生曰東作  
方興非牛何以耕俟三冬或可爾至期氓復來請生反  
覆壁言曉之乃已州人士求連生族祝生持其成暨委禽

致餼繼以金幣生笑曰孰謂君子而可以貨誘乎悉遣去人復譁曰是可以義取者生猶不之欲况其他乎於是鄉人教子者恒指生為法效學焉生名恒字本初姓楊氏白鹿生因其所居號之云

史官曰余與生游者三十年不可謂不相知者待罪國史時遂白執政薦之入成均聞生不受州縣辟事乃寢然其行義可法者不當使其泯泯因為造小傳如右隱之與顯非所以論生也

王先生小傳

王先生毅字剛叔其先自琅琊徙居處之龍泉至先生  
十有三世世為農初西隣有王氏子事身奉神甚謹嘗  
斲木為拜其當額處成窪母某氏有妊夢王來而誕在  
赤子時頗異遇浴及手足露皆怖而哭姑懷之則止頭  
患瘍母惡其臭卷木葉掩鼻當乳時閉目弗之視痲疾  
大作身熱如火炊榻畔懸繩代梳無風繩自搖及能言  
備陳入浴時如蹈大海茫無津涯風入手足間痛苦刃

割姑衣有繢能覆之乃安木葉氣烈不可近熱弗能禁  
神出戲繩上下視一小兒僵卧心知其為已也熱退乃  
復還人咸竒之六歲知好書家單不能致每借市中一  
誦輒能記憶稍長所嗜益深父機命牧牛掛書牛角而  
讀之隨牛而東西行日入忘歸復使之視春溪濱挾冊  
坐輜車則米成粉不悟父怒逐之出世父與朋憐之為  
代償其米且令聚徒教授束脩之上悉以購書積至萬  
餘卷精思疾讀唯恐其不盡夜分燈屢涸猶聞其吟諷

聲或至達旦不寐因觀周子太極圖說嘆曰此升聖域之階梯也人心與上堪下輿同大局於一藝可乎會上饒鄭君原善來為郡錄事先生往質所疑鄭君甚器重之已而往謁許文懿公謙於金華山中公為詳陳理一分殊之旨先生豁然如夢斯覺居久之絕淮泗沂黃河而覩泰山鳬繹之雄徘徊闕里悵然有千載之思遂北至京師薦紳先生若黃文獻公潛揭文安公後斯翰林承旨學士歐陽公玄叅議中書危公素争相引重聲譽

翕然至有薦為檢討經筵編脩翰林者先生皆引分固辭俄南還鄉里益以躬行實踐為教其發明本心之學至利欲沈冥處多有感泣者一邑化之雖大山長谷愚夫愚婦皆知畏慕革心從善縣饑先生告令曰民饑且死大夫其得奠枕而卧耶即語以勸分之法閭右之家計口賦之食餘粟盡乞貧民全活者以萬數父老見先生拜且泣曰我等皆白骨也而先生人之爾至正中荆襄兵起掠七閩直犯縣南鄙先生畫八策贊將軍石抹

宜孫破之仍不遠萬里遣其徒上書行御史臺以明將  
軍之功未幾盜發青田揚言來攻縣長吏寶忽丁遁盜  
遂深入焚官舍汙人女婦剽鹵至鷄犬先生召門人章  
溢季文謂曰吾豈忍以良民界豺兕乎溢等曰唯先生  
命乃部勒鄉民為兵逐殺羣盜大府錄功賚之以金幣  
先生曰得選賢令以撫創殘民則殺拜賜侈矣謝不受  
俄部使者下令正丁罪丁志集季溪惡少年據險阻以  
方命首害先生于家縣人無少長皆痛憤灑泣以復讐

為事弟子胡深方叅軍事鄱陽急馳歸與同門友告諸  
方伯連率帥師剪夷之越二年始平葬先生蓋竹鄉之  
西山別建祠而尸祝之先生為學深見天地萬物一體  
之意視衆氓之顛隳如已病之苟力可救雖鈇鉞鼎鑊  
在前後有不暇恤至於禽魚之微不得其所亦為蹙額  
弗寧思遂其生然疾惡如仇遇有賊民吏切齒扼腕流  
涕太息必疏其姦狀鋤而去之豪民制鉅量以入粟亦  
叱使減去以合常度小人不便為惡時欲加害賴上官



察之獲免生平不食君祿其尊主庇民之念夢寐不忘  
武威余闕公持節浙水東廉知之謂其卓行不讓古人  
性不溺文辭歎曰當今之世何能文者如牛毛而植德  
者若麟角蓋亦知重輕乎人有求者揮毫立就亦淵然  
有奇氣可誦自幼不茹葷肉雖強之食終弗能下咽閒  
居敝容澄坐多至夜中或倦極目瞑鼻息雷鳴坐客未  
寢者談辨蠶起晨興先生各能記其言而折衷之其神  
全而不亂如此歿時年五十二娶樓葉二氏無子以兄

子彥荀為後扁書室曰木訥齋人因稱為訥齋先生云  
太史氏曰昔者山陽殷子通以儒術教授里中人薰  
為良善者眾及隣境寇作子通帥弟子起兵殲之長  
吏惡攘其功使人殺子通門生毛術手刃殺者梟首  
以甘心焉君子多其義其事與先生絕類雖然先生  
以明體適用之學保障鄉縣使三十萬蒼生去危即  
安非子通比也固不幸遇難而死諸生為師復讐兵  
屯二年弗解卒尸鼠輩于市功比術為尤難祠宇之

建不建又在不論由是而言其義不益多歟嗚呼先生道德之化蓋亦入人深矣

杜環小傳

杜環字叔循其先廬陵人侍父一元游宦江東遂家金陵一元固善士所與交皆四方名士環尤好學工書謹飭重然諾好周人急父友兵部主事常允恭死於九江家破其母張氏年六十餘哭九江城下無所歸有識允恭者憐其老告之曰今安慶守譚敬先非允恭友乎盍

往依之彼見母念允恭故必不遺棄母母如其言附舟  
詣譚譚謝不納母大困念允恭嘗仕金陵親戚交友或  
有存者庶萬一可冀復哀泣從人至金陵問一二人無  
存者因訪一元家所在問一元今無恙否道上人對以  
一元死已久惟子環存其家直隲洲坊中門內有雙橘  
可辨識母服破衣雨行至環家環方對客坐見母大驚  
頗若嘗見其面者因問曰母非常夫人乎何為而至於  
此母泣告以故環亦泣扶就坐拜之復呼妻子出拜妻

馬氏解衣更母濕衣奉糜食母抱衾寢母母問其平生  
所親厚故人及幼子伯章環知故無在者不足附又不  
知伯章存亡姑慰之曰天方雨雨止為母訪之苟無人  
事母環雖貧獨不能奉母乎且環父與允恭交好如兄  
弟今母貧困不歸他人而歸環家此二父導之也願母  
無他思時兵後歲饑民骨不相保母見環家貧雨止堅  
欲出問他故人環令媵女從其行至暮果無所遇而返  
坐乃定環購布帛令妻為製衣衾自環以下皆以母事

之母性褊急少不愜意輒詬怒環私戒家人順其所為勿以困故輕慢與較母有疾疾環親為烹藥進匕飭以母故不敢大聲語越十年環為太常贊禮郎奉詔祠會稽還道嘉興逢其子伯章泣謂之曰太夫人在環家日夜念少子成疾不可不早往見伯章若無所聞第曰吾亦知之但道遠不能至耳環歸半歲伯章來是日環初度母見少子相持大哭環家人以為不祥止之環曰此人情也何不祥之有既而伯章見母老恐不能行竟給

以他事辭去不復顧環奉母彌謹然母愈念伯章疾頓  
加後三年遂卒將死舉手向環曰吾累杜君吾累杜君  
願杜君生子孫咸如杜君言終而氣絕環具棺槨殮殯  
之禮買地城南鍾家山葬之歲時常祭其墓云環後為  
晉王府錄事有名與余交

史官曰交友之道難矣翟公之言曰一死一生乃知  
交情此非過論也實有見於人情而云也人當意氣  
相得時以身相許若無難事至事變勢窮不能蹈其

所言而皆去者多矣况既死而能養其親子吾觀杜  
環事雖古所稱義烈之士何以過而世俗恒謂今人  
不逮古人不亦誣天下人哉

詹士龍小傳

詹士龍字雲卿光之固始人父某宋開慶中都統勇勝  
軍守鄂以偏師巡渠巴諸州與元兵戰南平身嬰九創  
被執發憤不食卒元兵破鄂降其軍士龍生三歲同母  
胡氏北遷董忠獻公文炳以其父忠也鞠為子文炳長



子名士選故命其為士龍飲食衣服一視諸子外人不  
能辨諸兄忌之罵曰虜子見幸乃同我輩耶士龍不知  
其故泣訴文炳文炳曰爾真吾子飛語慎毋聽也士龍  
哀祈益切文炳頗漏言士龍晝夜流涕欲復詹為姓受  
文炳卵翼恩深未敢言一日獵滹沱河遂陳前志文炳  
戲曰爾投石水中石浮吾當爾從也左右皆笑士龍仰  
天祝曰天若不絕詹氏石當浮因投石水中石盤旋急  
流中若沈浮者數四文炳以手拍鞍曰詹都統之靈其

不死乎即令士龍復詹姓文炳薨為服齊哀三年歲時  
祭祀必先設神主率家人奠之士龍後用文炳弟文忠  
薦為高郵興化尹士龍修築捍海堰三百里數郡利之  
初發地獲范希文石記曰過詹再修事蓋前定云轉兩  
淮都轉運鹽使司判官改淮安路總管府推官拜江南  
行臺監察御史時姦臣柄國虐斲方熾士龍上章劾之  
未幾事果敗士龍退隱興化葺草堂德勝湖上若將終  
身朝廷念其老成以廣西廉訪僉事起之居二年鬱鬱

不樂乃移疾而歸年五十八卒子澍岳州華容尹文炳妻以從女實因前好云

史官曰精誠之格將何所不至上致日星之應下召物產之祥古則有矣今觀士龍投石之事其惡可不信哉或者致疑天人之間視之若茫然不相通過矣子總修元史時有司不以聞失於記載因徇其孫婿余文昇之請刪其墓志為小傳一通以傳

孝子丘鐸傳

丘鐸字文振汴之祥符人故御史中丞劉基先生弟子也通儒書兼習醫家言流聲動一時至正末父誠為湖廣等處儒學提舉鐸侍母馬夫人留吳越欲御車往從江右兵大起武昌陷兩浙鐸騷鐸憂懼不知所為急避地四明暨江南皆歸職方復奉母至南京每西向翹首曰武昌有來者庶幾知吾父之所在乎已而其父果至自武昌父子相見悲喜交集鐸賣藥市中以自給親驩然忘其貧曾未幾何母弟鈞擢會稽上虞巡檢鐸與父

母皆同赴官夫人疾鐸晝夜泣禱上下神祇乞以身代  
及歿鐸哀慟幾絕卜葬鳴鳳山之原哭曰鐸生也咫尺  
不離吾母膝下今逝矣可委體魄於無人之墟乎乃結  
廬墓側朝夕上食如生時當寒夜月黑悲風蕭颼如臨  
鬼神鐸恐母岑寂也輒巡墓號曰鐸在斯鐸在斯其地  
多虎聞鐸哭聲輒避去故會稽人異之稱為真孝子云  
先是鐸在四明從祖父母居汴者八人貧不能自存鐸  
咸迎養之死皆返葬先塋人以為難其姑適河南匡氏

者年十八夫亡誓不再適鐸義之養其終身凡二十年如一日然其制行峻絕它皆類此文不能盡載也

為說者曰予聞鳴鳳山當白馬上妃二湖間人跡罕至白晝虎狼旁午鐸孑然獨處心無畏懼者豈不以親之體重於身乎然身者親之枝也可不敬乎敬其身斯孝其親矣鐸情固迫切當知以禮自節哉當知以禮自節哉

危孝子傳

臨海孝子危貞昉字孟陽事親以孝聞其父孝先洪武  
辛亥進士擢官麟游丞再遷陵川坐法謫役浦江縣貞  
昉時為郡諸生聞之奔訴於郡守欲走代之守以其名  
隸學籍難其行貞昉號泣于庭曰人孰無父哉奈何獨  
沮於我也左右為之言獲如其請即日上道詣京師伏  
闕上疏曰臣父陵州丞孝先不幸絳吏議輸作大江之  
濱筋力向衰不能執事而大母范氏春秋復踰九十旦  
旦念之恐染霜露之疾無以遂其菽水之忱終天之憾

或及其身臣犬馬之齒方殷願代父作勞使其歸養雖  
即死無恨聖天子以孝治天下惟哀矜焉疏奏上惻然  
從之貞昉乃解儒衣易短製欣然就役施施無難色然  
質體尪弱不勝負任之苦越七月病卒貞昉通周易兼  
能學唐人歌詩性剛直讀古忠孝事斂衽久之且曰使  
貞昉生其時亦當若是爾遇交友患難蹈湯火赴援不  
為利害惑卒時年二十八聞者皆悲之

為說者曰父子體殊而氣同者也故古之孝子不以



身自私非過激也宜也有如貞昉者詣闕上疏欲代  
父受役毅然以死自誓唯知有父而不知有身其殆  
近於古之孝子者非邪嗚呼死生於人大矣貞昉之  
死於孝是有益於天衆民彝之重無愧於俯仰無慊  
於神明奚翅足矣他尚何說哉彼悖德犯上者亦曷  
嘗不死其死也如敗豚腐鼠人孰稱道之觀吾貞昉  
則若威鳳之翔千仞可望而不可即得與失又為何  
如哉貞昉之名宜登國史以風厲四方予舊史官也

特為置傳使秉直筆者他日有采焉

瞿孝子傳

瞿孝子嗣興字華卿蘇之常熟人父達元初為百夫長遷蘇州巡鹽大使兼管內六縣捕盜轉怯憐口提領母某氏孝子天性純慤依依親側若不忍斯須釋者母患癰癰潰當長夏臭穢不可近孝子燂湯洗滌執扇驅蚊蚋靡晝靡夜至月餘乃休既而又罹積氣疾衝擊上下百藥不治或授以刳股可療法祝刀于天俟刀躍方可

用孝子頓顙流血刀弗動孝子情迫切強取刀割股肉  
作羹以進母不食已五日忽盡啖之氣銷如失一旦母  
思芟食時芟始華孝子求諸市不獲凡川有芟者解衣  
入水歷覆其葉覓之雙脰皆赤腫孝子號呼曰神明不  
相我乎俄得三芟水中人以為精誠所感然其宅心仁  
厚單簞者必思賑給而不欲使其知趙工王氏家無擔  
石儲且卧疾不能興雞初鳴孝子往其門以錢二十緡  
投窻隙而去民有告糴者鶉衣百結孝子受其直五千

復陽問曰吾性多忘若欲糴十千耶遂如數與之鬻蔬  
翁過門孝子市錢五十文以楮幣五百文授翁令補餘  
錢翁愠而辭孝子曰汝第持去他日見還未晚也負販  
夫或來貿遷孝子一聽其言不與較家人怪之孝子曰  
彼竭汗血以逐什一之利寧能足吾欲乎歲大儉來相  
依者數十人孝子擇旁近舍舍之會厲氣作病者相枕  
藉孝子每晨躬攜粥藥撫視卒賴以全孝子朝出道中  
拾遺囊孝子悉歸求者一金不自私未幾又有亡契券

及白金者孝子感額曰白金固易致質劑乃資業所憑  
藉其必起爭端乎密偵其人還之其人勢家奴因失主  
物畏懼幾欲死謝曰三尺微命孝子所賜也孝子雖不  
讀書其篤行類鄒魯士州里翕然稱之孝子年且耄見  
介子莊宦學有立洪武初擢禮部員外郎喜動顏色其  
後病且革言不及家事惟曰死生恒理爾煩語吾兒莊  
善事聖天子毋以老身為念也遂終

史官曰濂待罪禁林日與莊為同官莊念父在遠一

語及之涕泗潜然流濂因歎曰非誠心愛日者乎已而蘇人來言孝子之賢絕於醜夷有未易追躡之者濂又歎曰非是父焉能有是子傳所謂以身教者孝子其庶幾乎是有關世教民彝之大故造瞿孝子傳使圓冠方履者讀之必將惕然而自省矣

孫孝子傳

孫孝子諱惟中字伯庸濰州昌邑人祖明父琳世為農孝子朝出耕夜歸讀古人書性雅愛宋名人言行歷歷

能道之凡所謀猷恒取以為則年及壯用推擇為寧海  
州史一年貢益都府瀕行會父卒皇皇如欲無生縣有  
漢昌邑王廢城舉柩葬城中結庵廬其側藉苫以居曠  
野無人深夜月冷哭聲依稀隨悲風遠聞人為泣下日  
啜淖糜二盂却酒肉弗御晨起無火掬雪頰面輒拭  
前拜久之手足皸瘃形容焦瘁甚或勸其還哭而不對  
閭師韓泰亨帥闔巷民言于縣縣尹戴友諒弗之信將  
廉之伺夜半攜二蒼頭出風雪中抵庵廬而聽孝子聞

足音遙問曰暮夜欲何為戴嘆息而去以為不讓古人  
亟上之府部使者加覆察如縣言請旌其門文達中書  
禮部不報孝子長身美髯善談古今事遇子弟若嚴師  
家法著于井落多效之娶劉氏從孝子之化居舅喪亦  
不近酒肉三載生三子尚志尚文尚德尚志業為儒今  
禮部主客主事云

史官曰李璫據益都明被兵掠至洪溝去家三十里  
年始十歲兵以其童也易之明夜遁俚俚亂行有老



父教之曰兒但從吾指以往即至家矣明如其言走  
固隄鹽場中草深滅頂而豺狼左右嗥明竟得還父  
母亦避兵方歸舉燈索明不得相向哭燈忽作花復  
自相慰曰我兒其返乎不然此花何徵也言未訖忽  
聞叩門聲啓視之明也亟挽以入初父止生明今明  
之子孫逾四十人而惟中又孝行卓卓如此天之不  
絕孫氏者其有以哉

周賢母傳

周母王氏名妙貞括人祖德潤父思齊辟為州縣吏生  
十齡見父有戚容問曰家業幸粗給大人當開口笑樂  
何乃自鬱鬱邪父曰此事非爾女子所知吾所掌獄案  
死者欲生之不可得故弗悅爾王氏曰名教自有樂地  
何不棄之復溫繹書詩邪父曰不意女子能發斯言吾  
之意正如此耳即日揖上官去人賢之瀕嫁父欲厚其  
裝環珥輦輓之屬無所不飭王氏視之澹如出示二女  
弟恣其所取既歸事君舅君姑盡禮處娣姒之間恒欣

欣然或主中饋身先之不專役媵人鄰有寒餓及喪禍輒周其急歲壬寅山寇作避地魯峰顛惡少年欲來侵掠王氏偵得實遣人撻其姦盜驚而潰其母項因世亂來依極力奉之以悅豫其心王氏嘗嬰疾衆醫束手謂不療忽夢老父與易氣及覺氣騰騰從頂升挾日絕粒不食已而果元氣來復疾頓瘳識者謂為神助云其夫則周世英生男女各二女皆有所歸男曰荃曰茂茂有文學政事出仕矣王氏年今七十云

金華宋濂曰予嘗從史官之後遇人有善者必謹書之將以誘民衷而樹世防也有如周母能成父志惟孝於尊章出其餘智亦足破雀鼠輩之姦其中必有大過人者矣於戲賢哉賢而得書亦春秋之法也

二賢母傳

瑞安有大姓曰吳氏世守禮度而嚴於昏嫺柳州教授挺生子欽年近弱齡挺欲為之擇配久且未成或曰同郡胡節有容德且達宦之後可室也乃遣行媒知名節

之父悅焉六禮既備故節來歸於欽內外宗暨媼御而  
下宜之生子璟鞠育至長為娶縣人林廉廉名卿孫粗  
習書傳躬躬然勤翼翼然抑畏節愛之不翅若親女廉  
亦事節若母懷妊九閱月璟以病死未死執廉手涕泣  
惓惓以養親存孤為託廉諾之後三十日廉生一男子  
且悲且喜曰吳氏之宗其不為敖氏餒鬼乎未幾欽亦  
卒節與廉蓬首垢面自稱曰未亡人誓撫遺孤以不墜  
其家後六年元政日紊四方寇盜蠭起市魁都伯各聚

農為兵陽號保障陰則倚藉為姦有利吳氏多貲欲奪  
廉之志廉年二十有餘爾善自閉拒不可撼遂有謀殺  
其孤者廉懼棄家挾姑而遁擇隣境大山匿焉艱難備  
嘗室如懸磬無絲毫怨懟意惟飭厲兒以學無有寒暑  
晝夜年三十九卒節撫棺哭泣竟欲無生益督兒事書  
詩勿怠又二年節亦卒兒名荃今為巨儒州人識與不  
識咸稱為吳氏二賢母云

太史公曰吳氏之系何其危哉當璟瀕亡時荃在母

腹男女未可知林氏毅然以存孤為諾非見義明如  
皦日能然乎使林氏之足一移吳氏宗祀墜矣此其  
功非再造其家者乎譬猶狂瀾東奔欲舉隻手以障  
之抑難矣予謂林氏具五美焉其不畏強禦一也富  
而能貧二也炳於幾先而不陷於虎口三也干戈紛  
紜之中嚮環釗市書厲子以學四也終始一致不為  
浮議所惑卒令終於牖下五也夫然故其能以節操  
顯著者宜哉雖然不為之先孰為之後非胡氏挈綱

振維於上則林氏茈茈然無依矣是則胡氏者不為  
尤賢乎賢哉二母如楚之雙璧光彩交映見者動容  
如越之雙劍光芒閃鑠不可狎玩誠可謂無愧於舜  
倫者矣嗚呼女婦且爾則凡受人家國之寄委棄若  
土梗者果何心哉

閩二婦傳

賴道慈閩古田縣人歸同縣張文孫生一清十五歲而  
文孫歿於疫道慈甫年二十九黃華亂家又毀於兵羞



服且弗完能確然守志弗渝人力撼之泣曰張氏自浮  
光遷閩其不絕如綫者唯此一子耳余奈何去之及一  
清成人為娶婦廖氏生三子願興埜而廖亡繼以陳道  
真道真亦古田右族既歸一清鬻簪珥治財與道慈再  
植張門一清事道慈孝極甘旨道真相之唯恐有不足  
而遇廖之子不翅已出道慈晚嬰末疾手足不能用道  
真與滕人余乙恒挾持以就虎子道慈體肥重疲力從  
事逾十春秋弗厭人難之道真生以寧年十餘日授書

十三帙帙三紙道真夜宿火至四鼓自起執燈呼兒誦書坐其傍以俟頃刻皆能暗記黎明命之出送至齋門乃還以寧愛書或忘食道真執匕餽之任其恣觀不輟二十七以春秋擢泰定丁卯進士第繇國子助教八遷而為翰林侍講學士秩二品累贈道慈道真皆清河郡夫人一清贈福建江西等處行中書省叅知政事文孫贈禮部尚書閩人榮焉謂道慈之節道真之孝皆卓絕不可及殆天報之也道慈卒時年八十而道真則七十

云傳有之婦道盡而天倫正有若二婦其所謂盡於婦道者耶

鄭節婦黃氏傳

黃為浦江著姓自隋唐以來即有聞而宋隆興癸未進士度亦其族也其居辛山者曰德清有女曰琇字守貞生賦淑姿不失故家遺範父母愛之為其擇良配元至正己丑冬十二月歸同縣鄭氏瀛字仲容守貞年甫二十奉上接下無愆禮人稱其賢明年仲容髡患疽流注

肌覈間一潰一興累累如連珠百藥弗驗守貞扶掖卧  
起附膏於紙而更敷之雖甚久無懈怠意又六年仲容  
歿守貞自矢不再適且曰生為義家婦死為義家鬼敢  
失節以玷旌門乎其志堅凝屢有撼之者不少動寒燈  
孤幌澹然能自安遂命仲容從子拊為其後守貞今四  
十九矣及見拊授室生二子燦燦朝夕受其孝養云昔  
者孔子稱宓不齊之善而歸於魯國之多賢蓋觀感而  
興非有資於賢者要亦未易以成名也今鄭氏之家十

葉聚食至大辛亥嘗旌其義門其規度整肅如嚴霜烈日可畏而可仰其德義之涵濡又如春風和氣之薰蒸不自知其入人之深故其化行教洽過其門者猶率德勵行而乖戾之慮消況為其家之婦者乎宜守貞執節之堅而循禮之謹也傳曰一家仁一國興仁其理誠不誣哉予官儀曹時郡國多以節婦事行來上輒聞報下褒異其門閭觀風使者或以守貞為言其有不彰明之者乎異日烏頭雙表之樹與旌門後先輝映不亦一家

之盛美哉予故輯其事為傳文一通衣冠之士儻有扶植彝倫為任者尚見諸賦咏以同其傳云

柳氏二節婦傳

柳氏二節婦者上虞柳宗遠妻唐及其子桂之婦陳也初唐年二十三歸宗遠事其姑孝越二年生一子桂而宗遠卒或少唐恐其難寡居也以語試之唐忿曰吾喪夫命也婦不二醮義也命天使然義出於人心吾縱不畏天能昧吾心而負義乎且吾姑老吾子少吾去之將

安求乎益苦心瘁力營粟帛以養姑命桂學詩書於鄉  
先生姑年八十餘乃終而桂長遂娶陳女為婦陳歸桂  
逾年桂亦卒陳年甫二十四或閔陳無子且少也勸其  
再配陳哭曰此豈人所言乎吾姑不負吾舅吾敢負吾  
夫乎吾寧即死柳氏牖下不願聞此語也乃去膏沐屏  
華靡與其姑相依以居姑食然後食姑寢然後寢家內  
外事必告而後行姑婦孝愛如母子歲時具醢醪祭柳  
氏亡人二婦甄然拜階下輒涕泣不能相視後以某子

某為桂後今唐年六十陳亦四十鄉人咸稱為二節婦云

史官曰夫婦者相扶以生者也相扶以生者人道之常也不幸遇夭折臨患禍夫不獲婦其婦婦不得夫其夫是豈人情所願也哉斯變故也夫人處平居無事雖至閭劣皆可以勉事有出於難處者雖奇偉丈夫時時猶有失焉況婦人哉若柳氏姑婦皆在少年喪夫處人之所難堪以至于老余讀其事未嘗不為



之歎息也人常患後世俗不逮古是烏可槩言乎二婦之所為擬之古賢婦何讓乎余因門人朱瑾請為列其事使繼此執筆者有取焉

王節婦湯氏傳

婦以節名非常也變也變而不失其正不亦善之善者乎若王節婦者是已節婦名慕貞姓湯氏世居武林施水坊父榮母戚氏慕貞生十七年同里王君暹聞有容德俾其子常真鴈納為室既歸三族媼御交譽之常字

彥常少有遠游志既生女及男驥元至正乙未出商番  
禺既而之桂林後六年死焉慕貞二十七矣遙望南海  
淚眼無乾時上承舅姑米薪鹽醢之費靡不經度不足  
使蒼頭貿易以給舅姑忘其子之亡舅嘗患疽慕貞稽  
顙北辰乞以身代疾乃瘳舅有女兄二人年耄無所依  
慕貞迎還於家忠養同其姑夫之季弟曰暉娶史氏育  
二女貧不能嫁慕貞擇良婿治嫁具遣之暉與史旅死  
三衢慕貞不憚千里之遠取二喪藏諸先塋其訓驥尤

切俾事賢傳受春秋三傳之學國朝洪武癸丑取浙江  
行省第六名文解貢入成均選授吳王府伴讀朝夕陳  
訓于王久之拜監察御史近以使事入閩過其家方獄  
大臣洎部使者交謁于門問母夫人無恙人為慕貞榮  
慕貞不自樂也且曰我未亡人爾自意危如朝露不復  
有今日幸視驥加長歲時持一觴酒酌王家墳上庶他  
日九泉見彥常無慚色爵祿之有無皆天也奚暇計哉  
君子愈賢之嗚呼婦之青年喪夫最號多艱儻居貴富

家有儻勝足以備驅役闔廬足以蔽風雨粟帛足以供  
衣食猶可自安苟或焚焚弔影室如懸磬忍寒夜織機  
聲與候蟲齊鳴達曙不休自非鐵心石腸未必不為之  
動也學士大夫讀四庫之書平日抗手論天下事何處  
更有豪傑一遇絲髮利害反眼若不相識視女婦未嘗  
知書者乃有所不及可勝嘆哉濂於慕貞之事不得不  
為之紀載也夫移風俗美教化之道慕貞實有焉因具  
書之以厲為人婦者贊曰

婦以節名初非美稱唯王婦湯守變以貞心堅同石  
操潔如水太史作傳永揚休聲前翰林學士承旨嘉  
議大夫知制誥兼修國史兼太子贊善大夫金華宋  
濂撰

周節婦傳

節婦姓趙氏名淑宋燕懿王之裔安定郡王令諤九世  
孫也令諤從高宗渡江南居越諸暨遂為諸暨人父孟  
德有文學生二女節婦長且賢尤愛之授論語孝經列

女傳皆能通其義年十八求宜婿者得同邑周本恭歸焉始歸而姑卒既而舅及兄公妣氏亦相繼死兄公子顯宗尚幼節婦相夫飭喪治墓咸盡禮育顯宗如子歸十一年生三男宗善宗祚宗政宗政始生時天下亂夫嬰疾甚恐不起顧節婦曰今兵革四興嗣子單弱如此我死爾能自保乎節婦嚙指流血泣曰天在斯吾有不能保孤兒者天實誅之夫卒節婦年二十九髮跣號泣泣間含食哺諸兒不暫出戶限明年國朝克諸暨與偽

吳分邑拒戰兩兵交焚掠家貲無纖毫存節婦抱兒及  
顯宗從一勝出走匿惟持田籍以行深山窮谷間飢餓  
顛踣削木膚采藜藿以食或問其艱勸之曰呱呱者  
何足恃奚為自苦耶節婦怒不與言剪髻髮示之益自  
裁戢厲色峻辭使人莫敢近兵定而歸富民侵主其田  
殆盡節婦持田籍與婢卒賴以完知州田若賦高其行  
欲上其事于朝節婦曰宜然耳何足上聞力辭不願乃  
復其家節婦感泣日治麻縷為布帛以繼乏絕市詩書

教諸子夜焚松脂于室坐諸子兩旁而口授之或怠睡  
首俯輒咎咄不少恕諸子皆凜然畏憚如嚴君觀其色  
變即惴恐莫敢舉目視及長遣從名師遊所友善士相  
過則喜為之置酒否則憤歎竟日節婦以兄公早歿惟  
顯宗存為之昏娶先於已子羞服與諸子同人不知辨  
諸子遜弟皆有士行宗祔入為太學生以文行稱人咸  
謂節婦善教所致云

史官曰世之傳節婦者多貴殺身為難能至於守義



不二者則略而遺之余甚惑焉鋒刃之威迫于後湯  
火在前有所不顧此人情所能勉至於困窮災變切  
身凍餒顛踣而不渝其志存人之孤非篤於禮義者  
其孰能之若周節婦是矣嗚呼此豈特賢於女婦而  
已哉

謝節婦傳

節義人性之所有也豈以所居而變哉南雄在嶺之南  
山毒海悍風氣與中州殊論者或從而訾其習俗其言

陋矣若謝節婦者安可輕耶節婦謝氏女南雄人年二十八適郡士鄒永泰居四年生子忠甫十月永泰得疾危懼或死有父母存且子幼莫為計以語覘婦曰吾旦夕死然吾家貧安敢以老親幼子累爾哉婦流涕曰君豈病而狂易耶君萬一不幸養老撫孤妾職也妾一移足忍見鄒氏兒為人奴隸乎已而永泰卒窶貧甚飢盜無朝夕儲節婦躬力蠶織為布帛易粟以奉舅姑忠八歲使就鄉師學節縮服食以資束脩禮其舅姑不知其

貧及舅姑卒鬻所居廬以易槨櫛行喪治塋務合儀則  
或閔其艱勸其再事富人節婦曰我豈不知富人勝於  
鄒氏乎然鄒氏我所安也使我食他人八珍九鼎不若  
飲鄒氏杯水耳益自操守不少變教其子為儒節婦少  
嘗讀孝經小學書通達義理故能盡婦道云

史官曰嗜慾之性人孰能免哉能以禮義制之則不  
入於邪僻矣婦之事夫當無恙時指天地神明誓生  
死不相違棄及遇變故能如其言者蓋鮮矣豈非不

達理義使然耶若謝婦者夫死困厄幾不能為生而處之欣欣然行其自誓之語如合符契非禮義淪於心能致是耶嗚呼禮義足以治人也久矣

韓節婦傳

節婦韓氏名惟秀開封人元四川行省左丞渙之女也年二十一歸耶律文正王四代孫養正養正時為劉莊場鹽司令甫六閱月歿于官節婦行三年喪乃還父母家適其弟敏以疾卒貳子肅寬俱幼節婦與敏妻賈氏

約曰吾聞古之烈女不更二夫吾與汝皆簪纓家子宜則效之苟或失思慮再醮於人縱死為鬼亦當有餘羞耳賈氏悅曰此妾之志也朝夕乎父母舅姑之側旨若甘恐或不備也衣與衾恐或不完也教肅與寬又恐不知其方也左之右之同心弗少懈歲壬辰賈氏亡節婦哭之慟曰爾何遽去予而死乎予寧與爾俱亡乎不火食者三日已而又曰吾苟死其奈父母何遂割情忍泣奉尊撫卑如賈氏存時見寬以才學被選列官國朝再

轉為侍儀使節婦今年五十九其母則八十五云

史官曰易有之不節若則嗟若无咎又曰安節亨蓋不改其節則必能亨違節之道則哀嗟自己所致無所怨咎矣聖人作易當無物不該推此以喻節婦庶幾亦有合者乎節婦自耶律君沒制行如白璧者三十有八年使令名昭晰於無窮視彼夫骨未寒輒棄之他適為人唾去而弗齒者果孰為亨而孰為不亨乎況節婦無子可依毅然堅其苦志於母家此尤卓

異可書者故備列之然賈氏能與節婦同志卒以節終亦賢婦也哉

趙節婦傳畧

監脩國史長史張君子長著趙節婦傳畧辭至九百餘節婦之孫嗣鴻懼讀者莫得其要請濂刪其辭為傳畧云節婦徐氏名定瑞婺蘭溪人年及笄歸金華趙時堯時堯父旰夫亦娶徐節婦姑也無子生二女時堯以再從子為其後二女以非已同出不相寧節婦相夫順受

之母子以和時堯卒節婦年甫三十誓不再適養其姑終身撫弱子至於成人復三十年乃終若節婦者其無愧婦道者耶

王貞婦傳

王貞婦名妙清會稽人年及笄歸同里可先樓君生二子叔仁澄叔仁始七歲澄僅四月而樓君亡貞婦毅然以節自誓朝齏暮鹽或不能給而貞婦安之從事殘燈敗杼夜叅半猶隱隱聞伊軋聲人數有撼之者志如鐵



石而弗可動舅姑亦憐其少欲俾更適人貞婦泣曰妾聞婦人於夫一與之醮終身不移妾何敢忘家縱貧得服勞於舅姑之側他日九泉之下當有以見吾夫儻舍之而去雖終日飲醲齧肥犬彘亦不食其餘矧人乎哉妾有死而已不能從也舅姑見其語剛而意不回復義之貞婦自是事舅姑益致其恭教二子從良師遊皆成人知問學亦頗能盡孝見稱於士君子間貞婦夫死時年二十七而今已五十四矣

史官曰嗚呼若貞婦者豈不為難哉自陰教久不行  
女婦不知詩書謨訓其所欲為鮮克由於禮者矣而  
貞婦乃能矯然自異如勁松挺挺於蒿萊間是何可  
及也嗚呼若貞婦者豈不為難哉

玉貞婦傳

貞婦名順榮字靜安姓王氏台之黃岩金沙里人性莊  
毅日處深閨人不見其面其父廣東元帥嗣奇之慎擇  
所配年十七歸同邑楊伯瑞伯瑞以才用世累官行樞

密院斷事官階從四品得封貞婦河南郡君至正間貓  
獠兵侵天台伯瑞帥師往扼之弗勝遂遇害貞婦時年  
四明年二十有七生子慶壽始兩月聞夫亡躑躅欲求  
死親屬交相慰解遂護喪還塋于鄉屏鉛華弗御戴道  
家冠被鶴氅衣脩然如塵外人未嘗輕於笑語人謂之  
則曰我未亡人爾尚何心追逐世好耶鄉里小兒欲媚  
上官以貞婦美姿容嗾使聘之不從將以威劫其去貞  
婦遽引刀斷髮痛詈不少休事遂寢越三年有權貴人

聞其賢強委禽焉貞婦度不免拊膺長號呼曰楊樞密何在楊樞密何在妾將相從于泉下因悶絕仆地隣人扶齒以藥灌之移時乃蘇俟間執慶壽手曰吾命婦也不敢虧節以辱汝父汝父亡我非不能死以汝年幼將誰育之即不育歲時何人持卮酒以酹汝父墳乃忍死至今今汝已十齡我復何憂我將死於汝父之墓言訖泣而行慶壽號訴從母林氏林亟往救貞婦以刀自剄不殊林奪刀挽之歸環守至旦稍解貞婦復斷髮如初

權貴人曰此烈婦不可強之強之不祥嗚呼女婦之質  
甚弱耳扣盜足以駭走之今貞婦乃不為威武所屈若  
是非其秉志剛見義明有不能也世以丈夫自居者冠  
帶儼如步趨鏘如議論藹如人倘以女婦目之則頽然  
怒去及究其所為一遇小利害則甘心喪其所守似婦  
人女子之不若抑又何說哉然自兵亂以來婦人徇節  
而不屈者或自剄死或墜崖下死或赴水火而死固人  
之所難此特出一時義烈所激爾有如貞婦處孤燈敗

惟間淒風蕭蕭然中人歲積月深必有甚不能堪者恒  
人之情寧不為之少哀貞婦之操則愈堅如鐵石百折  
不撓豈不尤人所難者乎使一鄉之得若人必有率德  
而勵行者由是達之一邑一州無不皆然其於移風俗  
美教化之道有國家者蓋有賴焉是宜為之傳以俟觀  
民風者

贊曰昔夏侯令女夫死不嫁遂致斷髮為信或處迫  
之急乃割耳與鼻誓不欲類於人至今想其遺風猶

凜凜然可畏也今貞婦截髮絕人其厲操蓋與令女  
同若其持刀自刎比之割耳鼻者且欲并身而捐之  
其志為益苦矣嗚呼令女不可見有若貞婦其所謂  
異世而同符者非耶

徐貞婦鄭氏傳

徐貞婦鄭名妙靜衢之西安人其父頤本簪纓家娶周  
無它男子惟產四女而貞婦居其三年十齡粗通孝經  
大義沉毅如成人諸女或與之狎輒厲聲叱之皆畏懼

不敢近父奇之慎擇所歸聞同郡徐思誠乃宋忠莊公  
徽言之七世孫代有顯人而思誠又習進士業煜煜而  
文於是慨然許之及合卺成禮貞婦已十九矣時舅天  
祥與姑朱氏春秋皆高貞婦靡日靡夜事紡磚惟謹由  
是羞服備給上獲舅姑心凡遇賓祭亦悉意助集不足  
則質簪珥供事及其自奉疏食水飲甘之若飴舅歿貞  
婦出所蓄布帛為含襚衰經諸費始得成喪思誠出卜  
藏地舟覆溺死上航溪貞婦哭慟幾欲無生不憚勞勩



葬舅與夫先塋之側養姑高堂日問起居察時燠寒為

衣進之退撫二子謙貞俾從醇儒學而與勝己者交非  
其類者絕之雖寒燈涼幌人不能堪貞婦處之裕如父  
母及諸娣憫其年少欲使其更醮貞婦曰吾夫固亡有  
二子在斯不謂之亡矣脫若無子其如老姑何義亦不  
忍去也具人之形而大戕其行妾肯為之乎即引交股  
刀截去髻誓不二夫聞之者懼不敢撼貞婦見二子成  
立謙以行義察舉為部使者掾以政事聞擢為瀧水丞

貞婦喜曰吾今而後可以見吾夫地下矣謙當之官會  
恩例覃及於親受文綺紬繒之賜貞婦益喜召謙至出  
白金盤八授之曰國家寵恩至矣爾居官宜冰蘖自守  
祿或不給則售此用之慎毋黷貨為也洪武二年知縣  
何忠以貞婦年三十夫亡寡居二十八年冰清玉潔可  
以厲民風乃上其事於府知府王珍加覆覈焉浙江按  
察僉事張思立復廉其非誣然後具牒上行中書以次  
達之中朝三年四月得旌表其門如今貞婦今踰六十

又四康強無它疾嘗有田宅為強族所據屢訟不得直  
夫歿讓弗與競及宅轉售他姓貞婦贖居之識者謂貞  
婦知大體云

史官曰禮始夫婦者何蓋有夫婦而後有父子有父  
子而後有君臣三者雖殊其道一而已矣若使婦不  
二其夫子不屑其親臣能忠於君天下其有弗長治  
者乎奈何世教淪胥士大夫誦法先王徃徃或至於  
悖君父有如一女婦之微不甚知書乃能抗節自守

足以增於五倫之重亦可慨也夫故予於徐氏之事  
特為著傳文一通不少讓將以厲子職樹臣節重名  
教非曰徒作也有來讀者毛髮將聳然而立矣

蔣貞婦傳

蔣貞婦德新世居歙之黃山自幼莊靜父忠甫為之擇  
配鮮有當意者年二十有八始歸同郡羅宣明宣明鄂  
州刺史諸孫家法素謹貞婦奉尊章處先後咸底禮度  
中外稱之弗置至正壬辰蘄黃妖寇起破州郡屠戮人

如刈草管蔓延將至歙宣明散家貲募兵保障鄉井已  
而兵大集歙城陷官軍復者再三宣明功為多於己夏  
四月元帥沙不丁治歙城以宣明慷慨仗義俾分築一  
百三十尺宣明之家索於用兵其計無所從貞婦盡售  
奩中物相之宣明忘其憂乙未冬十二月祁門黟縣惡  
少年構浮梁劇盜來犯歙宣明謂貞婦曰我素負殺賊  
名賊必不貸我汝宜相從軍中如何貞婦曰婦人在軍  
中兵氣恐不揚子獨不聞之乎妾有兄弟在香山砦柵

頗可守妾往依之君努力自愛勿以妾為念也遂灑泣而別丙申春正月歙城復陷宣明請兵江浙行中書賊聞宣明妻孥在香山攻之益力二月天雨雪寨破賊大肆焚掠初貞婦以宣明從征不忍茹酒肉至是炮炙行觴命左右醉飽以二子驢兒馬兒屬蒼頭奴詹寄詹勝寶曰事勢至此我誓不受辱一死決矣然不可使羅氏無後汝宜護二兒還主翁也言訖勝寶負驢兒出勝人挾馬兒繼之貞婦又繼之遇賊石崖上賊遂褫其衣貞

婦力拒賊攫貞婦髮貞婦齧其臂爪其面出血罵曰死  
狗奴汝何不殺我賊怒斫其臂以刀舂之墜崖而死驢  
兒見母死哭罵曰賊賊爭忍殺吾母他寇曰何等小物  
敢爾耶橫槊刺其背死勝寶道寄不勝怒執木戟擊傷  
數寇與媵人皆遇害日將夕寇退貞婦從姪蔣志道從  
積屍守緣崖下見貞婦屍如生傍有衣篋類有物窵窵  
然動啟視之馬兒在焉亟抱以歸宣明云

太史公曰喪亂之餘女婦以節著者有矣若歛之蔣

氏何其烈哉夫以柔脆之身竟欲抗如虎之盜自非  
義激于中視死如歸其氣不如是之明也大抵故家  
遺俗詩書之澤弗替宣明又能奮揚而飭導之使一  
門之內婦死於夫子死于母而一蒼頭之微亦能為  
其主捐軀此殆難以聲音笑貌為也然則宣明亦賢  
矣哉賢者宜有後篋中之兒所以能獲全於今也

王媛貞阮傳

王媛貞阮者名淑藁城人均州守阮容之子歷陽王瑀



之妻也瑀故名閼淑亦出右族好禮而貞一陽和陰肅  
懿聞流三族間瑀以材起家為裨將當戍夫槩夫槩與  
敵土犬牙瑀將邏騎偵其營敵意勁兵壓境悉力迎戰  
瑀知不能免蹈白刃前邏騎皆逝瑀尋被執以不屈死  
淑慟曰夫者婦天也吾天傾矣尚何所仰哉遂蒙被泣  
卧不粒食媵人以食進淑麾曰去吾不食矣已而氣貼  
貼若絲先後僅屬媵人又以藥進淑復麾曰去吾不藥  
矣如此者七日竟終年甫二十三爾淑葬金華城北黃

塢其顛有異瓜生蔓一而四實其色光翠如沐者君子  
謂淑能知貞道矣貞道明則常倫定矣詩云鬢彼兩髦  
實維我儀之死矢靡他此之謂也

贊曰翼翼貞阮執行有常夫成而倖盡然隱傷不食  
以死其節煒煌瓜瓞之生天旌厥祥

宋烈婦傳

烈婦宋婺華音字新金華潛溪人美姿容幼即讀書知大  
義榻管作字亦莊正可觀既長歸烏傷賈明善足不妄

踰戶閭雖家人弗聞其笑語聲一宗謹曰是端簡靜默也賈氏有婦矣父母亦賢之不忍其遠去左右越一年令與夫來居潛溪烈婦孝養益謹見諸女讀古烈女事則慨然想其為人既而曰是亦不難為婦者當壁碎而潔無寧瓦全而穢也歲戊戌十月西兵擣蘭溪遠近大震烈婦不自安同夫避入浦陽城竇山中未幾鄉民嘯聚倡亂樹旌燾執劒殺人如刈草菅烈婦亡匿灌莽中為游卒所執乃抽銀條脫求解不聽將亂之烈婦以計

給曰吾有珠貝可直數千緡昨夕瘞山前坎中爾幸無  
急我急我我將死於爾何利不若導爾發之游卒悅其  
言從之行至深淵側竟躍入死焉時十一月十四日也  
其兄濂聞而哭曰天乎烈婦在家為淑女歸人為良婦  
既淑且良縱不備有諸福其豈不得考終于寢乎不知  
何為而遭茲兵禍也嗚呼自古莫不有死當是時執法  
之大吏秉鉞之將帥守土之二千石或有不能而烈婦  
獨能捐軀徇義死固死矣千載猶生視彼弗死而若死

者何如也縱遘兵禍又何傷焉然而婦之守貞猶人子  
之當孝人臣之當忠也烈婦之死恒道爾何足深羨乎  
雖然是固恒道爾而亦非易致也人之所欲莫甚乎生  
苟所見一髮未盡則幸存之念興幸存之念興含辱忍  
垢何所不至哉想其臨淵之時貞剛之氣充塞上下天  
不足為高地不足為厚日月不足為明視區區微生直  
鴻毛輕耳不然何以能若是之烈也徵太平日所言當  
璧碎而潔母令瓦全而穢者不亦允蹈也哉烈婦之事

與乾之竇氏越之王氏無大相遠求之千百而不一二見焉濂因不避親撫其行實著為私傳一通所以白烈婦之志他日傳之竹帛詔諸海內良史氏職也非濂之所計也

謝烈婦傳

謝烈婦弟婺之金華人年十三適蘭溪吳履奉尊章處宗族以禮性勤而剛事非義毅然執弗行鞠撫衆鰥幼箴補綴常至夜分雖血貫指不自寧履貧而宦游家政

一聽希能弗墜戊戌春三月西師破睦州游騎日壓境  
土帑懼急謂履曰妾聞西師鐵騎逾十萬數出則塵埃  
蔽天白日為黃既得睦必東窺婺謂其不至者妾也卿  
讀書號男子宜察知之妾衰瘦如鬼旦暮禍及決不能  
挈弱幼遠遁曷若先買舟東下為上計否則歸妾母家  
母家南有池即有急以身餒魚鱉爾誓不受污以病君  
也履重於行給曰勿恐有履在也冬十月二日丁卯履  
出城南帑復申前言且祝履曰宜急旋稍緩噉臍無及

矣履復答如初越四日辛未芾見潰軍被血衣東奔不  
絕謂勝人曰事急矣候鷄再號裹糧挾季女以東勝人  
負小兒從明日壬申力憊甚芾猶手牽女且行且泣曰  
汝父不得復見矣吾與汝死即死耳身不可失也遂避  
入金華山中勝人後視芾不相及棄小兒道上亦泣去  
已而游兵四出赤幟徧山澤東西作呼嘯聲虜女婦無  
筭芾度不可免力疾捫蘿而上抱女投崖下死履歸求  
之浹日始得尸母與女相向其貌如生時嗚呼人極之



所由建者三綱也使臣子之於君父皆如帝之弗畔其  
夫國家安有喪亂之禍哀哉嗚呼世之號士君子者平  
居暇日高自稱譽無不曰我學周公仲尼之道苟指為  
婦人女子則勃然怒去一旦君父有難輒或竄或伏不  
翅狐兔是婦人女子之弗如抑又何說也然自兵興以  
來女婦以節著者亦頗見之未有若帝之烈者也夫豈  
樂死惡生者哉誠以義塞于內與其生而抱愧寧若死  
而就安推其所志神明可通金石可貫衡獄之層雲可

開非細故也。彝倫風教於是所係為甚重。濂故為文道其事使濂言行人心或不亡者當自省矣。嗚呼彼有家而奉箕箒者孰非人婦孰非人婦哉。

贊曰：戊戌之變，濂女弟嫠亦以秉節沈淵死。後烈婦持三十有六日爾，濂悲之淚落弗止。聞有如嫠者必謹叩之，或歷其地以訪焉。間嘗過金華山中，問烈婦投崖處，悲風四集，林木怒立，猶凜凜有生氣。豈其貞魂烈魄猶足以感人耶？烈婦雖死，其弗死矣夫。

張義婦傳

義婦張氏濟南鄒平人年十八歸戍卒李午午同從子  
零出戍七閩未幾午死張獨事舅姑父母生養死塋無  
遺禮復痛夫死數千里外枯骨未知所歸乃往卧冰上  
呼天祝曰天乎妾夫何罪妾夫何罪生既不見父母死  
又不能歸塋父母之傍使無妾即已妾在敢愛死乎天  
若許妾取夫骨雖寒甚當不得死踰月竟不死鄉人異  
之為聞于縣給過所遣之至閩零猶在問夫塋地則榛

莽日塞不可識張哀慟幾絕夫忽降于童與張語生前  
事甚悲且示骨在處張如其言發得之持骨祝曰爾信  
妾夫耶入口當融如冰雪黏如膠已而果然官義之為  
上于大府請復其家使零護喪歸濟南

金華宋濂曰濂聞長老言廬陵有趙應祥者父行賈  
死利津亂塋叢塚間應祥求之慟哭七日夜不得乃  
解髮繫馬鞍上祝曰天若有知行至父墓鞍即墮未  
幾鞍墮發而視之果父也塋時所題名氏猶存此與

義婦之事頗類傳曰孝悌之至通於神明此之謂夫

貞婦郭丑小傳

郭氏丑字道安六合人也美姿容其父彬授之書詩輒  
通大旨母劉氏得疫疾諸弟妹尚幼羞服無所倚賴道  
安上扶掖母氏起居下撫孩穉漱澣紉綴之事皆親之  
冬盛寒燈火蕭然持箴恒至夜半不休且不樂靡麗身  
衣紬素同綺繡女偕坐畧不動容目亦不注視至於纂  
組烹飪不經師授而悉精其能彬絕愛之不肯歸九子

同里鄭玄來求婚彬激曰爾能從師攻文辭即可爾玄

乃力學道安年十九竟妻玄婦道甚修譽起一鄉間玄

以古列女傳難之道安曰某女事如此某女事如彼一

一舉之無漏文玄不能屈因加進學功其父讓不悅痛

繩之玄悒悒不樂道安曰子但盡誠盡孝他非所知也

瞽瞍底豫之言豈猶不聞之耶玄釋然道安秉性堅貞

疆暴欲侵凌道安厲色叱之去其人恃為尊屬屢見白

道安彈指出血曰父誤我矣父誤我矣不幸遇此唯有

一死爾。滕人勸曰：何不告？夫君知道。安曰：吾苟白其故，父子何面目相見？耶曰：此人倫之變，宜走訴父母，使其知所忌，不敢肆。道安曰：祇揚惡聲耳，無益也。不若就死之，為安日向中道，安潛出沈于河。時洪武十年七月十七日也。彬聞之，悲欲無生，瘞於揚子西沙清水潭上。一夕玄夢其來，車馬儀衛甚都，且曰：妾今在長蘆水府掌鉤考人間善惡，念子索居故一來耳，不可久留也。言畢，颯然如雨風而去。次夕其姑夢亦如之，長蘆在六合。

城南二十五里云

史濂曰郭氏素稱詩禮之家婦人女子亦有異於人  
彬之姊真適許士瞻生一女而士瞻死年始二十三  
年今垂五十而節操凜然而道安又貞烈如此誠可  
為敬仰哉傳言忠節之人歿必為神明長蘆之事雖  
近誣亦不敢謂決無是理也嗚呼新臺之什孔子刪  
詩而不削去者其垂訓也遠矣哉

文憲集卷十一



謹案第一頁前五行唐古氏舊作唐兀氏錫喇卜

藏布舊作沙刺藏卜今並改 三頁前四行巴

延舊作伯顏今改後仿此 後六行鴻和爾布

哈舊作晃忽兒不花今改 二十頁前二行昂

吉岱舊作甕吉今改





總校官庶吉士臣侍 朝

校對官中書臣王鍾泰  
謄錄監生臣畢所諱